



23.feb. 2016

UPA 2016 /82

Inatsisartut Suleriaasianni § 33 naapertorlugu aalajangiiffigisassatut siunnersuut saqqummiunneqarpoq:

Inatsisartut aalajangiiffigisassaattut siunnersuutigineqarpoq Naalakkersuisut peqquneqassasut Peqqinnissaqarfiup aqunneqarnera, aaqqissuussaana kiisalu peqqinnissamat tunngasutigut sullissisut aamma tarnip pissusaanik ilisimasallit pillugit Inatsisartut inatsisaat nr. 27, 18. November 2010-meersup § 3, imm. 2 naapertorlugu kingusinnerpaamik 2017-imi, Naalakkersuisut tarnip pissusaanik ilisimasallit peqqinnissaqarfiup iluani, pisortat oqartussaasuini allani namminersortunilu ilinniakkaminnut tunngasutigut silinerat pillugu malittarisassanik erseqqinnerusunik aalajangersaanissaat.

(Inatsisartunut ilaasortaq Steen Lyngø, Atassut)

Tunngavilersuut:

Pisortat oqartussaasuini aammalu namminersortuni katsorsaariaatsinik assigiinngitsunik neqeroortarneq pisariaqartitsinerlu annertusiartuinnarpoq.

Katsorsaariaatsit assigiinngitsorpassuit pisortatigoortumik akuerisatut katsorsaanerupput ilaallu katsorsaariaatsit allaanerusumik aallaaveqartuullutik.

Psykologii (tarnip pissusaannik ilisimatusarneq) pisortat peqqinnissaqarfiini suli nutaajusutut oqaatigineqarsinnaavoq. Assersuutitummi oqaatigineqarsinnaavoq Danmark-imi psykolog-itut taaguuteqarsinnaaneq aatsaat 1994-mi illersugaalersimammat.

Kalaallit Nunaannili pissutsit allaanerusumik inissisimapput. Taaguut Kalaallit Nunaanni illersugaanngilaq, taamaattumik innuttaasut psykolog-imit katsorsartittut inatsisitigut innarlitsaalisaaneri assigiinngitsutigut allaanerusumik atugassaqartitaapput. Tassanimi



apeqqutaavoq katsorsartinneq namminersortuni imaluunniit pisortat peqqinissakkut oqartussaasuinit ingerlanneqarnersoq.

Namminersortuni kinaluunniit psykolog-itut imminut taagorsinnaavoq sulisinnaallunilu, arlaannaatigulluunniit psykolog-itut ilinniarsimangikkaluarluni. Psykolog-init katsorsartinnermut atatillugu ilinniarsimassutsimut pitsaassutsimulluunniit piumasqaateqanngilaq, tamanna peqquteqarpoq psykolog-it pillugit erseqqarinnersumik malittarisassanik aalajangersaasoqarnikuunngimmat.

Innuttaasoq periarfissaqanngilaq namminersortuni katsorsartinnermut atatillugu pitsaassutsimut imaluunniit ilinniarsimassutsimut tunngatillugu Peqqinnissamik Nakkutilliisoqarfimmut maalaaruteqarnissamut. Innuttaasorli maalaarsinnaatitaavoq pisortat peqqinissakkut oqartussaasuini katsorsartinnera ingerlanneqarsimappat, tassanimi psykologi-sut ilinniarsimanissamik piumasqaateqarpoq aammalu katsorsartissimasoq maalaarnissaminik periarfissaqartinneqarluni.

Taamatut assigiinngitsumik inatsisitigut inissimatitsineq innuttaasunuinnaq kisimi eqquinngilaq. Namminersorlutik psykolog-isut suliaqartut aamma inatsisitigut illersorneqarnermikkut aamma eqqorneqarput. Taakkumi assigiiaakkanik piumasqaatinik tunngaveqarlutik sulinissaminik periarfissaqanngillat, psykolog-isut ilinniarsimanissamik aammalu taamatut sulisinnaanermut piumasqaatinik tunngaveqanngikkunik, illersorneqarnerat tunngavissaqanngimmat.

Taamatut siunnersuuteqarnerup anguniagarivaa innuttaasut psykolog-init katsorsartittut aammattaq psykolog-isut suliaqartut inatsisitigut illersorneqarnissaat annertusarneqarnissaat, apeqqutaanani katsorsartinneq namminersortuni imaluunniit pisortat oqartussaasuini ingerlanneqarnersoq. Taamatut assigiimmik inatsisitigut innarlitsaalisaanerit anguneqarsinnaapput psykolog-it pillugit erseqqinnerusumik malittarisassanik aalajangersaaffigineqarpata ilinniarsimassutsimik ingerlatsinerit peqqinnissaqarfup iluaani ingerlanneqarpata, pisortat oqartussaasuini allani aammalu namminersortuni.



Inatsisartut inatsisaata nr. 27, 18. November 2010-meersup atuutilersinneqarneratigut Naalackersuisut pisinnaatitsissummik tunereernikuuvagut Peqqinnissaqarfiup aqunneqarnera, aaqqissuussaanera kiisalu peqqinnissamut tunngasutigut sullissisut aamma tarnip pissusaanik ilisimasallit pillugit. Isumaqarpunga piffissanngortoq, napparsimasut illersorneqarnissaat eqqarsaatigalugit erseqqarinnersumik aalajangersaanissaq, taamaattumik una aalajangiiffigisassatut siunnersuut saqqummiuppara.

Pisortanut aningaasaqarnermut allaffissornermullu sunniutissat.

Malittarisassanik naleqqussaanissamut sulisoqarnissaanik atuisoqartariaqassaaq. Tassungali aningaasartuutit AC-mut ukiumut aningaasartuutit sisamararterutaannit annertunerunissaat naatsorsuutigineqanngilaq, tassa imaappoq nalunaarusiornissamut 125.000 kr.-nik atuisoqassagatinneqarpoq.

Naalackersuisut peqqinnissamut tunngasutigut sullissisut peqqinnissaqarfiup iluani, pisortat oqartussaasuini allani namminersortunilu peqqinnissamut tunngasutigut sulinerat pillugu malittarisassanik erseqqinnerusunik aalajangersaasinnaatitaareerput. Inatsimmut oqaaseqaatini allassimavoq, malittarisassat malitsigisinnaagaat nalunaarsuinissamut piumasaqaatit assigisaallu, tamatumallu malitsigisinnaavaa annertunngitsumik pisortanut allaffissornermut aningaasaqarnermullu sunniuteqarsinnaavoq.

Piginnaatitsilluni inatsimmi allassimavoq, inatsimmi allassimasut naapertorlugit malittarisassanik unioqqutitsisimanerit tunngavigalugit akiligassiissutit isertitatut missingersuusioneqarsinnaaneri pillugit naatsorsuusioqqusaannginneq.

Pisortanut aningaasartuutit qanoq annertutigiumaarneri taamaasillutik erseqqinnerusumik aalajangersaanerit qanoq ittuujumaarneriniippoq.

Inuussutissarsioortunut namminersortunut aningaasaqarnermut allaffissornermullu sunniutissat.

Inatsimmi allassimavoq, Naalackersuisut peqqinnissamut tunngasutigut sullissisut peqqinnissaqarfiup iluani, pisortat oqartussaasuini allani namminersortunilu peqqinnissamut



ATASSUT INATSIARTUNI

tungasutigut sulinerat pillugu malittarisassanik erseqqinnerusunik aalajangersaasinnaapput. Ilaatigut malittarisassat nalunaarsuinissamik piumasaqaatinik assigisaannillu ilaqarsinnaammata aammalu malittarisassanik unioqqutitsisimanermi akiligassiisoqartarsinnaammat, annertunngitsumik inuussutissarsiortunut namminersortunut allaffissornermut aningaasaqarnermullu sunniuteqarsinnaavoq.

Innuttaasunut aningaasaqarnikkut allaffissornermullu sunniutissat

Siunnersuut innuttaasunut aningaasaqarnikkut sunniuteqassanngilaq. Susassaqarfiulli erseqqinnerusumik aalajangersaaffigineqarneratigut napparsimasut illersorneqarnerat aammalu innuutaasut inatsisitigut innarlitsaalisaaneri annertusineqassapput.